

# Il Grischun sco model per in svilup persistent

Il Grischun è chantun ospitant a l'exposiziun Natur 2012 a Basilea

DA MARTIN CABALZAR

■ **L'exposiziun ed il congress Natur a Basilea è la plattafurma naziunala la pli impurtanta ed enconuschenta che è deditgada al svilup persistent. Sco chantun ospitant a la Natur 2012 ha il Grischun la pussaivladad da sa preschentar sco regiun da model. En il center stattan ils differents parcs.**

Ier han il cusseglier guvernativ dal Grischun, *Martin Jäger*, ed il directur da Natur 2012, *Beat Jans*, sutscrit a Cui-ra la cunvegna da cooperaziun correspundenta. Natur 2012 ha lieu il medem mument sco la exposiziun da divertiment Muba e quai dals 13 fin ils 16 d'avrigl a Basilea. Per la participaziun a questa exposiziun naziunala cun in grond effect da reclama per il Grischun ha la regenza mess a dispusiziun 320 000 francs. Tenor Beat Jans vulan l'exposiziun ed il congress Natur 2012 «intermediar savida, mussar pussaivladads d'agir e sensibilisar ils visitaders per in svilup persistent». Plidentads vegnian tant exponents da la politica sco da l'economia. La Natur 2012 sco exposiziun speziala da la Muba cumpiglia 100 stans e carmala natiers mingamai radund 40 000 aspectaturs.

## Il Grischun sco chantun ospitant

La Natur 2012 dat al chantun Grischun, als parcs grischuns ed a lur partenaris la pussaivladad da sa preschentar ad in vast public sco regiuns da model per il svilup persistent, da quai saja la regenza loscha, ha sincerà Jäger. Tantpli che la regenza sastentia da promover in svilup persistent che procura per in equiliber tranter finamiras economicas e basegns ecologicis. Al congress vegnan pliras represchentantas e plirs represchentants dal Grischun a formular patrats fundamentals davart il tema «La cuntrada en il champ da tensiun tranter la protecziun e l'utilisaziun» ed a sa participar a las discussiuns.

## Il Grischun sco model per in svilup persistent

En il center da la preschentaziun dal Gri-



Il manader per il Post per turissem e svilup persistent en il Center da capricorns a Vargistagn Stefan Forster è responsabel per il concept d'exposiziun Natur 2012 a Basilea.

FOTO TH. GSTÖHL

schun a la exposiziun Natur 2012 stattan ils projects da parcs grischuns: il Parc Ela, il Parc natiral Beverin, il project per in parc naziunal Parc Adula, la Biosfera Val Müstair ed il patrimoni natiral mundial da la Unesco «Arena tectonica svizra Sardona». Al stan a l'exposiziun pon las visitadras ed ils visitaders gist vesair a maun d'in nov sistem d'infurmaziun directament ils parcs grischuns. Sco partenaris sa preschentan Grischun Vacanzas, la Viafier retica (VR), AutoDaPosta Grischun ed il Parc Naziunal Svizzer. Alpinavera, l'organisaziun per la commerzialisaziun da products regiunals, vegn a preparar in stan da degustaziuns ed ad offrir spezialitads grischunas, ensemen cun la Biosfera Val Müstair e cun ulteriuras producentas e producents da las regiuns dals parcs.

Ils cuntegns ed il sistem d'infurmaziun sviluppads pon vegnir applitgads ed amplifitgads vinavant a lunga vista – suenten l'exposiziun Natur 2012 a Basilea – en ils projects da parcs, e quai dal tuttafatg en il senn da la persistenza. Ultra da quai èn previsas suenten l'exposiziun Natur 2012 ulteriuras occurrenzas e preschentaziuns davart il tema.

## Leuthard e Jäger al congress

Al congress che ha lieu ils 13 d'avrigl 2012 e che vegn visità da passa 650 persunas spezialisadas che s'interesseschon per la persistenza referescha l'architect *Gion A. Caminada* davart il svilup dals abitadis e da la cuntrada. Il post da cumpetenza grischun per il turissem che s'accorda cun la natira e cun la cul-

tura da Vargistagn organischescha ensemen cun la rait da parcs svizzers in lavuratori davart il svilup da parcs. L'antierur cusseglier naziunal dal Grischun, *Sep Cathomas*, raquinta da las experientschas ch'el ha fatg cun la planisaziun dal territori en sia vischnanca burgaisa da Breil. La cussegliera federala *Doris Leuthard* discorra sur da la persistenza sin plaun federal. Il cusseglier guvernativ Martin Jäger explitgescha la perspectiva grischuna.

Ils 14 d'avrigl 2012 ha plinavant lieu sin l'areal da l'exposiziun da Basilea ina discussiun al podi davart la relaziun tranter las citads e la champagna. Expertas, experts sco er represchentantas e represchentants da Basilea e dal Grischun discuteschan davart propostas per in svilup cun avegnir dal

territori en las citads e sin la champagna.

## Direcziun ed organisaziun

Il project per la preschentaziun dal Grischun sco chantun ospitant a l'exposiziun Natur 2012 vegn purtà da l'uffizi per la natira e l'ambient (ANU). Il post spezialisà per il turissem ed il svilup persistent da la scola auta da ciencias applitgadas da Turitg (Center da capricorns, Vargistagn) dirigi da *Stefan Forster* è cumpetent per il concept e per la direcziun da la realisaziun. Il stan a la exposiziun e las ulteriuras mesiras comunicativas vegnan sviluppads e coordinads cun la firma Clus (agentura da reclama, Cui-ra) e cun Grischun Vacanzas. L'entira preschentaziun ha lieu sut il tetg da la marca Grischun («graubünden»).

## Natur 2012

Natur a Basilea è il lieu da scuntrada e da martgà svizzer il pli impurtant per la persistenza e per stils da viver che han in avegnir. Purschiders da products producidos en moda persistente e martgadads en in commerzi fair respectivamain regiunal mussan ch'il consum ed il giudiment cun responsabladad tutgan ensemen. La perscrutaziun, la scienza, organisaziuns ed il maun public intermediarian enconuschientschas e sensibiliseschan per la natira, per la cuntrada e per il svilup persistent. Natur a Basilea è l'occurrenza annuala la pli impurtanta davart il tema actualmain modern da la persistenza.

## Ins quinta cun 40 000 visitaders

A la 7avla exposiziun Natur dals 13 fin ils 16 d'avrigl 2012 beneventan passa 100 exposituras ed expositurs durant quatter dis pli che 40 000 visitadras e visitaders. Al congress Natur dals 13 d'avrigl 2012 sa scuntraran passa 650 persunas spezialisadas e talas che prendan decisiuns ad in barat davart las tendenzas las pli novas en connex cun il svilup persistent. Il tema central dal congress Natur 2012 è il svilup da la cuntrada.

Ulteriuras infurmaziuns chattan ins en l'internet sut [www.natur.ch](http://www.natur.ch).